

# INUIT ATAQATIGIIT

## Inatsisartuni



27. juni 2018

UKA 2018/43

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Ujaqqanik pinneraasiormik ingerlatsisut misilittagaannik ilanngussisumik nassuiaammik, inuussutissarsiormik ingerlatseersut akornanni, aallartitsisussani kiisalu annikitsumik aatsitassarsiormik akuersissutinik piginnittut nalilinnik annertunerusumik kaaviiartitsinissamat sulisuminnillu amerlisaanissamat aaqqissuussaannikkut aammalu inatsisitigut aporfissat suunerannik kingusinnerpaamik UKA2019-imi Naalackersuisut saqqummiussinisaat pillugu Inatsisartunut aalajangiiffigisassatut siunnersuut. Aporfittut suussusersineqartut qanoq ililluni piujunnaartinnissaannut sapinngisamilluunniit aporfiit annikinnerpaamiitinnissaannut siunnersuummik nassuiaat imaqassaaq.**

(Inatsisartunut ilaasortaq Aqqaluaq B. Egede, Inuit Ataqatigiit)

### **Tungavilersuut:**

Inuussutissarsiutit annertuut mikisullu tamaasa nunatsinni suliffeqarfittut inerisagassatut pingaartillugillu siuarsarusoaqagut. Aamma taamaappoq, nunatsinni ujaqqanik pinneraasiormik inuussutissarsiutip ineriartortinneqarnissaa pineqartillugu. Tassami ujaqqanik pinneraasiormik inuussutissarsiut immi suliffeqarfittut angisoorujussuunngikkaluaruniluunniit aningaasarsiornikkut ”angisoorujussuunngorsinnaammatt”.

Inuit Ataqatigiit ujaqqanik pinneraasiassanik suliaqartarnerup ineriartornera malinnaavigilluarparput, taamaattumillu UKA 2015-mi inatsisartuni ilaasortatitatta Peter Olsen-ip siunnersuuteqarneratigut ataatsimiisitaliaq susassaartup ”Kalaallit ujaraatasa illernartut uppernarsaatigisaasinnaasaannik periarfissanit assigiinngitsunik nassuiaasioqqullugit kingusinnerpaamik UPA2016-imi saqqummiunneqartussamik Naalackersuisut peqquneqarnissaannik Inatsisartut aalajangiiffigisassaattut siunnersuut” siunnersuut saqqummiuppara.

“Ujaqqat nunatsinneersut pinneraasiat ujaqqallu nunatsinneersut qiperukkat pillugit uppernarsaammik allagartaliisarneq pillugu nalunaarusiaq” 2017-mi saqqummersup ersersippaa allagartalersuineq ujaqqanik pinneraasiassanik suliaqartunut pisisartunullu iluaqutitaqassasoq. Nalunaarusiaq imminermini pitsaasuvoq atorfissaqarlunilu, uanili siunnersuummi angorusuppara suliniutit suliaareersut attuumassuteqartut pitsaasut nangillugit aningaasarsiornikkut niuernikkullu

iluanaaruteqarnerussagutta qanoq iliuseqarnissamut aqquutit qanoq iliorluta siuarsarsinnaanerigut paasinarsaasoqassasoq. Tamatumanilu nalunaarusiornissaq pisariaqartutut tikkuarusuppara. Nunatsinni aatsitassarsiornikkut siuariartussagutta nunaqavissut atsitassarsiornikkut ineriartortittariaqarpagut, aatsitassarsiorneq inuussutissarsiutitut isigigutsigu nammineq ilisimasagut atorlugit ineriartorsinnaasariaqarpagut. Tamanna nunatta naalakkersuisuinikkut aquttuisa iliuseqarfigerusussallugulu soqutigineqassagaat qularutiginnilara.

Nassuiaammi takorloorpara, ukiuni tulliuttuni talliamani qulini qanoq pinnersaasiorlutik aatsitassarsiortut politikikkut siunnerfigineqarnissaat siuneralugu tikkuuussisumik suliaqartoqassasoq, soorunami pinnersaasiortut kommunillu peqatigalugit.

Ilaatigut nassuiaammi tikiqqartariaqarput annikitsumik aatsitassarsiornermik annertuumut ikaarsaariarnermi suut inatsisitigut periarfissaaneri misissornissaat, pinnersaasiorlutik aatsitassarsiortut inuussutissarsiutertik allisarsinnaajuaannarnissaanut inatsisitigut periarfissannik paasinarsaasumik pisariaqartitsimmata. Nunarsuatsinni takoreerparput suliffeqarfik ujaqqanik pinnersaasiortoq ataasiinnarmilluunniit sulisoqaralaruni suliffeqarfinniit angisoorsuarniit iluanaaruteqarnerusinnaalluortoq. Taamaammat ujaqqanik pinnersaasiassanik inuussutissarsiuteqarneq inuussutissarsiutitut mikisutut isiginaveersaagassavoq. Inuussutissarsiut nunatsinni aningaasarsiornikkut niuernikkullu isumalerujussuannorsinnaammat.

Nassuiaasiornermi makku apeqqutit tikiqqartariaqarput:

- Ujaqqanik pinnersaasiortut nunatsinni kiisalu ujaqqanik pinnersaasioriumallutik aallartisarussutut suunukua aporfigiqaat?

- Qinikkat uagut inatsisitigut ujaqqanik pinnersaasiortunut sinaakkusiunneqarsimafut pitsanngortikkumallugit qanoq siuarsaataasinnaanerput qulakkeersinnaavarput?

- Naalakkersuisut aamma naalakkersuisoqarfiit qanoq iliorlutik kiffartuussinerat pitsaanerpaanngortissinnaavarput? Aamma qanoq ililluta susassaartut tamatta suleqatigiilluarnerusinnaavugut?

Nalunangitsaq ataasinnaavoq, tassalu, Naalakkersuisut, Inatsisartut aamma partiit ataasiakkaat qanorluunniit akissuteqaralarpata akissutissaq eqqortoq ujaqqanik pinnersaasiortuniimmat. Taamaammat tusaasariaqarpagut, paasisariaqarpagut, ilaatillugillu aqutissioqatigiittariaqarpagut.

Siunertaavoq, qinikkat, ujaqqanik pinnersaasiortut, aamma allaffissornikkut pisortat kiffartuussivii tamarmik suleqatigiilluarfissaminnik anguniagassanillu siunnerfeqaqatigiillissasut. Paaseqatigiilluni siunnerfeqaqatigiillunilu ineriartortitsineq tamatsinnut angusarissaarfiussaaq. Taannaavorli amigaataasoq.

**Pisortanut aningaasatigut allaffissornikkullu kingunerisassai:**

Oqaatigineqareersutut ilisimasanik matumunnga attuumassutilinnik peqartoqareerpoq, ujaqqanut pinnersaasiassanut inuussutissarsiuteqarnermik ineriartortitsinissamut inuiaqatigiinni periarfissat pillugit nassuiaat 2015-imeersoq, ujaqqat nunatsinneersut pinnersaasiat ujaqqallu nunatsinneersut

qiperukkat pillugit uppersaammik allagartaliisarneq pillugu nalunaarussiaq 2017-imeersoq minnerunngitsumillu ujaqqanut pinnersaasiortunut aaqqissuussinerit 2016-imi ingerlanneqartut pingaarutilimmik matumani nassuiaammi tunngavissiissapput. Nassuiaasiornermi pinnersaarsiorluni inuussutissarsiorlutik ingerlatsisut misilittagaat akuutinneqassasut, tusarniaaneq, nutserineq il. il. aningaasartuutit AC Fuldmægtigep ukiup ataatsip marlulluunniit ukiumut ataatsimut 500.000 koruuninik naleqartoq naatsorsuutigaara.

**Namminersortunut aningaasaatigut allaffissornikkullu kingunerisassai:**

Soqanngilaq

**Innuttaasunut aningaasaatigut allaffissornikkullu kingunerisassai:**

Soqanngilaq